

Siunnersuut uunga: Kalaallit Nunatta pigisaannik sillimmasiisarfimmik pilersitsinerup iluaqtissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piumasaqaatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut

(Inatsisartunut ilaasortamit Anthon Frederiksenimit, Partii Naleraq, saqqummiunneqartoq)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Jens Immanuelson, Siumut, siulittaasoq

Inatsisartunut ilaasortaq Randi V. Evaldsen, Demokraatit, siulittaasup tullia

Inatsisartunut ilaasortaq Martha Lund Olsen, Siumut

Inatsisartunut ilaasortaq Ineqi Kielsen, Siumut

Inatsisartunut ilaasortaq Bendt Kristiansen, Inuit Ataqatigiit

Inatsisartunut ilaasortaq Kelly Berthelsen, Inuit Ataqatigiit

Inatsisartunut ilaasortaq Peter Olsen, Inuit Ataqatigiit

Ulloq 11. oktober 2017-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaata pigisaanik sillimmasiisarfimmik pilersitsinerup iluaqtissartaasa aporfissarisinnaasaasalu – tassungalu ilanngullugu pilersitsinerup aningaasartuutissat sulisussallu pillugit suut piumasaqaatitariumaagaasa – misissorneqarnissaanik Naalakkersuisut peqquneqarnissaat siunnersuutip kingunerissavaa.

Inatsisilerinermut tunngasumik allakkiaq

Kalaallit Nunaanni sillimmasiisarnernut tunngatillugu inatsisilerinermut tunngasumik allakkiamik Naalakkersuisut pissarsisimasut siullermeerinninnermut atatillugu paasisutissiissuti-

gineqarpoq. Suliarinninnissaminut atugassamisut allakkiap assilineqarnera ataatsimiititaliap qinnutigaa, taannalu isumaliutissiisummut **ilanngussaq 1**-itut ilanngunneqarpoq.

Ataatsimiititaliap siunnersuummik suliarinninnera

Inatsisilerinermut tunngasumik allakkiap malillugu sillimmasiisarfik tassaavoq ”*anigaaser-suineramik ingerlatsinermi taaguutaavoq, akiliuteqarnikkut inuttut ataasiakkaatut suliffeqarfittulluunniit anigaasarsiornikkut ingerlatsinermi, ilaatigut anigaasarsiornikkut ingerlatsinermit inatsisit tunngavigalugit ajutooratarsinnaanernut anigaasatigut akisussaaffimmik tigusisusoq, soorlu inummut sillimmasiineramik ingerlatsineq (livsforsikring) imaluunniit ajoqusernertut sillimmasiinermit ingerlatsineq (skadeforsikring)*”¹.

Ilaatigut ingerlatseqatigiiffiup annaasaqaratarsinnaanernut naapertuuttumik tunngaviusumik anigaasaateqarnissaata saniatigut suliffeqarfiit sillimmasiisarnermik ingerlatsisut sillimmasiisarnermik ingerlatseqatigiiffittut aallaaviatigut akuersissuteqassapput².

Matumani ilaatigut anigaasalersuineramik ingerlatsineq pillugu inatsisip Kalaallit Nunaannut atuutilersinneqarnissaanik peqqussut nr. 1252, 15. december 2004-meersoq kingusinnerusukkullu allanngortinneqartoq innersuussutigineqassaaq, tassani allassimalluni:

§ 126. Sillimmasiisarfittut ingerlatseqatigiiffiit aamma soraarnerussutisiassaqartitsiviit assigiinngitsut siulersuisuisa qullersaqarfiisalu qulakkiissavaat, ingerlatsiviup tunngaviusumik anigaasaatit naammattut pigissagai, aamma pigissagai nalorninartorsiorfiusinnaasunik naliliinermi ingerlatseriaatsit, aamma pigissagai nalorninartorsiorfiusinnaasunik aqutsinermi ataavartumik naliliinerit aammalu isumagissagaat tunngaviusumik anigaasaatit piginnarnissaat, amerlassusaat, suussusaat agguataarnerallu eqqarsaatigalugit, instituttip nalorninartorsiateqarsinnaaneranik naammattumik matussusiissat.

Tamatuma saniatigut pisussaaffiit sillimmasiisarfiup isumaqatigiissuteqarfigisaasa sillimmasiisarfiimmit eqquutsinneqarsinnaanissaat, taamaallunilu sillimmasiinermit tunngasumik pi-soqarnerata kingorna sillimmasertissimasumut tunniussinissap akilernissaanut sillimmasiisarfiup naammattumik aningasaateqarnissaa tunngaviusumik anigaasaatit aqqutigalugit qulakkeerneqassaaq.

Tassunga atatillugu sillimmasiisarfiup anigaasat pisariaqartitai sillimmasiissutitut niuerutigissallugit sillimmasiisarfiup toqqagaanit avissaartillugit isiginiarneqarsinnaanngillat. Tamanna ima paasineqassaaq; Sillimmasiisarfiup qanoq annertutigisumik pisussaaffeqarnissaanut apeqqutaasut niuerutit annertussusiat, qanoq ittuussusiat aammalu agguataarsimanerat, tassungalu ilanngullugu niuerutit sillimmasertittunut inuinnarnut imaluunniit inuussutissarsiortunut

¹ Tak. Kalaallit Nunaanni sillimmasiisarnermik ingerlatsineq pillugu inatsisilerinermut tunngasumik allakkiap (ilanngussaq 1, qup. 1).

² Anigaasalersuineramik ingerlatsineq pillugu inatsit nunani allamiunut Den Europæiske Unionip iluani imaluunniit nunami unionip anigaasalersuineramik ingerlataqarnermi isumaqatigiissuteqarfigisimasaa ingerlataqarnissamut akuersissummik nalunaarfigineqarsimasanut immikkut aalajangersakkanik imaqarpoq.

neqeroorutigineqarnersut. Apeqqut siunnersuummi maannangaaq isummerfigineqarsimanngitsoq. Siunnersuummulli tunngavilersuutikkut ersersinneqarsorinarpoq sillimmasiisarfik siamasissorujussuarmik toqqammavilik siunnersuuteqartup siunnersuutigigaa, tassami Namminersorlutik Oqartussat, ingerlatseqatigiiffiit Namminersorlutik Oqartussanit pigineqartut, suliffeqarfiit namminersortitat, suliffeqarfiit namminersortut taamatullu inuit ataasiakkaat innersuussutigineqarmata. Sillimmasiisarfiup taamaattup aningaasaateqarluarnissaa soorunami pisariaqassaaq³.

Aningaasaatit katitigaanissaanni ilaatigut apeqqutaassaaq "Kalaallit Nunatta pigisaanik" sillimmasiisarfiorniissamik siunnersuummi piumasaqaat qanoq paasineqassanersoq⁴. Tassunga atatillugu "Kalaallit Nunatta" qanoq paasineqarnissaanut piumasaqaatinik siunnersuummi aalajangersaasoqanngilaq, soorlutaaq "pigisaanik" oqarnermi allassimanngitsoq sillimmasiisarfik tamarmiusoq taassumaluunniit ilaannaa kalaallinit pigineqassanersoq. Aktiaateqarluni ingerlatseqatigiiffik tassunga atatillugu assersuutissaasinnaavoq, tamatumani ingerlatseqatigiiffiup aktiaataasa amerlanerpaartaat, tamarmiunngitsulli, kalaallinit pigineqarlutik. Assertuutissaq alla tassaasinnaavoq assersuutigalugu taasisinnaatitaasut, siulersuisuni inissat assigisaasaluunniit agguataarneqarnerisa kingunerisaanik ingerlatseqatigiiffik Kalaallit Nunaata tungaanit aalajangiisuusumik sunniuteqarfigineqarsinnaasoq. Illuatungaatigulli "kalaallinit pigineqartoq" allassimaneratut paasineqassappat nunanit allaneersut, tassungalu ilanngullugu danskit aningaasaliisinnanannerannik mattussisutut isumaqarfiginarsinnaavoq.

Kingullertut taaneqartumi sillimmasiisarfiup aningaasaatini tamaviisa Kalaallit Nunaanni pisarsiarisariaqassavai. Tamannalu pissutsit taamaanneranni unammillernartoqartut oqaatigineqartariaqarpoq, minnerunngitsumik nunatta aningaasaqassusia eqqarsaatigalugu. Tamatuma saniatigut nunatta karsia eqqaassanngikkaanni takujuminaappoq kikkut aningaasanik pisariaqartinneqartunik sillimmasiisarfimmut atugassiisinnaallutillu tamatumunnga kajumissuseqassanersut. Taamaalillunilu tamatuma ajornerpaamik kingunerisinnaavaa Namminersorlutik Oqartussat imminnut sillimmasernerat, tassami ingerlatseqatigiiffik nunatta karsianit aningaasat atorlugit pilersinneqassammat, taamaalillunilu taanna tamatuma peqatigisaanik – piginnittuusinnaasunik killilersuineq pissutigalugu – sillimmasiisarfiup ingerlanneqarneranut atuunneranullu pinngitsoorani qularnaveeqqusiissalluni. Tamatumani nunatta karsiata aningaasaliissutai sillimmasiisarfimmut pituttorneqassapput, taamaalillutillu inuiaqatigiinni ingerlatanut allanut aningaasaliissutigineqarsinnaassanatik.

³ Kalaallit Nunaanni sillimmasiisarnermik ingerlatsineq pillugu inatsisilerinermut tunngasumik allakkiami (ilanngussaq 1, qup. 3) allassimavoq akiliisinnaassuseqarnermut piumasaqaatip assersuusiorneqarnerani aallaavigineqarsinnaasut ingerlatseqatigiiffiup aningaasaatai nalunaarsukkat aammalu sillimmasiisarfiit matuma kinguliani allassimasut namminneq aningaasaataat, taakkunannga marluk Kalaallit Nunaanni immikkoortortaqarlutik: Tryg Forsikring A/S, Codan Forsikring A/S aamma Nordea Liv & Pension. Ingerlatseqatigiiffiit aningaasaataat nalunaarsukkat namminnerlu aningaasaataat 11,4 mia.-iupput, 10,6 mia.-iupput aammalu 7,1 mia. kroniullutik. Allakkiami erseqqissarneqarpoq assersuutaannaasut aammalu sillimmasiisarfiup tunisassiai aalajangersimasut ilisimanagit akiliisinnaassuseqarnermut piumasaqaatip annertussuaa maannakkut oqaatigineqarsinnaanngitsoq.

⁴ Paatsuungasoqanngunagu matumani oqaatigineqassaaq siunnersuutip taasissutissartaq tunngavilersuutitaalu imminnut naapertuutinngitsortaqarmata, tassa ingerlatseqatigiiffik "Kalaallit Nunatta pigisaa" (Kalaallisoortani: "Kalaallit Nunaata pigisaanik") aammalu "Namminersorlutik Oqartussat pigisaa" tunngavigineqarmata. Taasisutissartaata aallaaviginissaa ataatsimiititaliamit toqqarneqarpoq.

Aningaasanilli pisariaqartitsineq, taamaalillunilu sillimmasertittunut sillimmasiinnermigut sillimmasiisarfiup annaasaqaratarsinnaanera, annikillisinniarlugu sillimmasiisarfik sillimmasiisarfirmi allami imminut sillimmasertissinnaavoq. Periuseq taanna nalinginnaalluinnarpoq⁵, taamaaliornikkullu sillimmasiisarfiup taarsiissutitut aningaasartuutaasa ilaat allamit akilerneqarsinnaallutik.

Tassunga atatillugu kalaallit sillimmasertissimasut sillimmasiissutitut ullumikkut akiliutigisartagaannik ilanngaaserneqanngitsunik naatsorsuineq sillimmasiisarfirmik pilersitsisinnaanermut tunngavilersuutitut pingaarutilittut namminermit isigineqartariaqanngilaq. Taamaalillunilu sillimmasiissummut akiliutip ilaa taarsiissutitut nalinginnaasumik utertinneqartarpoq, taamaattumillu sillimmasiissummut aningaasartuutit ilanngaattissat ilanngaatigereerlugit naatsorsorneqarpata eqqornerussalluni. Tamatumunnga nangissutitut § 37 naapertorlugu apeqqummut nr. 2015/17-imut akissut innersuussutigineqassaaq, tassani allassimalluni:

Namminersorlutik Oqartussani annertuunik ajoqusertoqartarsimavoq. Soorlu Sisimiuni Sanaartornermut Ilinniarfiup ikuallannerata kingorna sanaqqinnermut, 80 mio. koruunit sinnerlugit naleqartumut. Nukissiorfinni aamma annertuunik ajoqusertoqartarsimavoq, 45 mio. koruunit tikillugit naleqartunik. Taamaattumik sillimmasiisarfik annertuunik arlalinnik ajoqusertoqassappat akiliisinnaassuseqarnissamut aningaasaateqangaatsiartariaqarpoq. Akiligassat akilerneqartarnerisigut taamaallaat isertitsisoqarsinnaavoq.

Kiisalu sillimmasiisarfirmik pilersitsinerup namminermini qulakkeersinnaanngilaa sillimmasiisarfiup isertitaasa inuiaqatigiinnut iluaqutissiinissaat, tassami aallaavittut isigalugu isertitat qanoq sumullu, tassungalu ilanngullugu Kalaallit Nunaata avataani ingerlatanut aningaasaliissutitut atorneqarnissaat sillimmasiisarfirmik aqutsisut nammineq aalajangiiffisassarigaat ilimagineqartariaqarmat. Tassa naalakkersuinnikkut akuliutinnginnissamik nalinginnaasumik tunngavik. Tamatuma saniatigut sillimmasertinnermut akiliutip ilanngaaserneqanngitsup ilaa nunanut allanut (ataatsimut isigalugu) toqqaannartumik nuunneqartartussaassaaq, tassa imminut sillimmaseqqinnissaq sillimmasiisarfirmi toqqaarneqarpat, taamaattoqarnissaami ilimagisariaqarmat. Illuatungaatigullu suliffissanik nutaanik pilersitsinermit aammalu piginnittunut iluanaarutinit tunniussisinnaanerup saniatigut sillimmasiisarfik akileraaruserneqarsinnaavoq. Sillimmasiissutinilli niuerfik aalajangersimasumik angissuseqartutut ilimagineqarsinnaappat sillimmasiisarfiup isertitai sillimmasiisarfinni piusuni taamaaqqaataanik apparartoqarneranik illuatungilerneqaratarsinnaapput.

Tassunga atatillugu sillimmasertissimasut sillimmasiissutiminnik sillimmasiisarfirmi piusumit sillimmasiisarfirmut nutaamut nuussinissaminnik toqqaassappata sillimmasiisarfik

⁵ Tak. Kalaallit Nunaanni sillimmasiisarnermit ingerlatsineq pillugu inatsisilerinnermut tunngasumik allakkiaq (ilanngussaq 1, qup. 4).

unammillersinnaassuseqartariaqarpoq. Tamatumani assersuutigalugu pineqarluni sillimmasertinnissamut akiliutissatut sillimmasiisarfiup piumasagaataa – aammali immikkut ilisimasaqarnermut isumannaassusermullu tunngasut pillugit sillimmasiisarfiup sillimmasertittunut neqeroorutigisinnaasai. Tassa sillimmasiisarfiup patajaatsuunissaa aammalu ajoqusertoqarnerani sillimmasiisarfiup isumaqatigiissummik (taarsiissuteqarnissamik) eqquutsitsinnaanerata sillimmasertittumit tutsuigineqarsinnaanera. § 37 naapertorlugu apeqqummut nr. 2015/267-imut akissut naapertorlugu Savalimmiuni misilittakkat takutippaat sillimmasiisarfiit imminnut unammillernerat sillimmasiisarfiit aningaasaqarnerannut kinguneqarsinnaasoq:

2001-mi sillimmasiisarfiit marluk imak sakkortutigisumik imminnut unammillersimapput, allaat sillimmasiisarfiminni aningaasanik amigartooruteqalerlutik. Sakkortuumik unammillernerup kinguneranik sillimmasiisnermut akiliutit appasippallaarsimapput, ilutigalugulu piffissap aalajangersimasup iluani ajoqusernerit amerlimmata, aningaasanik amigartoorutit pisimallutik.

Sillimmasiisarfik unammillersinnaassuseqanngippat, taamaalillunilu sillimmasiisarfiup aningaasaqarnerata qulakkeernissaanut sillimmasertikkumasunik naammattumik amerlassusilinnik sillimmasiisarfik pileritsatsitsisinnaanngippat, periarfissaq alla tassaasinnaavoq pinngitsoorani sillimmasertittussaataitanermik atuutilersitsinissaq. Tamanna ima paasineqassalluni; nunatsinni sillimmasiisarnermik niuerfiup tamarmiusup ilaataluunniit sillimmasernissaanut sillimmasiisarfiup kisermaassisussanngortinneqarnera. Tamanna assersuutigalugu pisinnaavoq Namminersorlutik Oqartussat aammalu suliffeqarfiit Namminersorlutik Oqartussanit pigineqartut sillimmasiisarfirmik atuinissamut peqquneqarnerisigut. Taamatut periuseqarnikkut sillimmasiisarfiup isertaqarnissamut aalajangersimasumik tunngavissinneqarnissaa qulakkeerneqassaaq, tamatumali peqatigisaanik sillimmasiisarfiit piusut ingerlatsinerannut akuliunnerussalluni, taamaattumillu taamatut peqqussuteqarneq unammilleqatigiinnermi maleruagassanut akerliunersoq pillugu misissuisoqartariaqarnera aallarniutigalugu ilimagineqartariaqarpoq. Tassunga ilanngullugu nalunarpoq taamatut akuliunneq sillimmasiisarfinnit piusunit qanoq isummerfigineqassanersoq, tamatumani apeqqutaasussaasorinarpoq peqqussuteqarneq qanorpiaq ilusilerneqarnerasoq.

Sillimmasiisarfirmilli pilersitsissagaanni sillimmasiisarfiup ingerlanneqarnissaani atuunnissaanilu pisariaqartumik immikkut ilisimasalinnik sulisussarsinissaq, taakkulu sulisoriinnarsinnaanissaat siullermik pisariaqarpoq. Sillimmasiisarfik akissarsiatigut atorfininnermilu atu-gassarititaasunik pitsaasunik neqerooruteqarpat unammilligassaq angussallugu ajornartariaqanngitsoq. Qularnarsinnaavorli kalaallit sulisartut akornanni pisariaqartinneqartumik ilinniagalinnik, kalaallit pigisaanni sillimmasiisarfirmi atorfiit inuttalernerqarnissaannut naammattunik peqarnerasoq. Pissutsit taamaaginnartillugit atorfiit ilaat sulisartunik avataaneersunik inuttalernerqartussaassapput, taamaalillunilu sillimmasiisarfik nunanit allaneersoq najukkami tuniniaasoqarfilik aammalu sillimmasiisarfik kalaallinit pigineqartoq nunanit allaneersunit sulisulik assigiinngissuteqarnerisut apeqquserneqarsinnaalissaaq.

Pissutsit qanorluunniit ikkaluarpata kalaallit sillimmasiisarfiannik pilersitsinissap pitsaaqutaasa ajoqutaasalu erseqqinnerusumik misissornissaat tunngavissaqarsorinarpoq. Tassunga atatillugu siullermeerinninnermi ersersinneqarpoq misissuinissaq naalakkersuinikkut oqaaseqartartunit tapersorsorluarneqartoq, tamatumalu saniatigut misissuinissap ingerlanneqarnissaanut Naalakkersuisut piareersimasut. Tamatuma akerlilernissaa ataatsimiititaliamit tunngavissaqartinneqanngilaq, Naalakkersuisunulli kaammattuutigineqaannassaaq misissuinermut atatillugu:

- Oqaatsip "Kalaallit Nunatta pigisaanik" suussusersineqarlunilu qanoq paasineqarnissaanik ersarissumik atuinissaq.
- Sillimmasiisarfiup kalaallinit pigineqartup qanoq ittuunissaa suussusersineqarlunilu qanoq iluseritneqarsinnaanerata nassuiaatigineqarnissaa. Tassungalu ilanngullugu niuerutit qanoq ittut kikkunnut unammilleqatigiinnermilu atugassarititaasut qanoq ittut aallaavigalugit sillimmasiisarfiup neqeroorutigissanerai kiisalu iluseritneqarsinnaasunut assigiinngitsunut tunngatillugu aningaasaatigisassat annaasaqaataaratarsinnaasullu pillugit piumasaqaatit nunatta karsianut qanoq kinguneqassanersut. Matumani iluseritneqarsinnaasut sillimmasiisarfiup suliassaatur pisussaaffiliunneqartussat naatsorsuutigineqartut naapertorlugit assersuutigalugu agguataarneqarsinnaapput, imatut paasillugu iluseritneqarsinnaasut ataasiakkaat suliassartamik annertussusiat naapertorlugu tulleriinnilersorlugit nassuiarneqarsinnaallutik.
- Namminersorlutik suliniuteqartut sillimmasiisarfirmik maanna pilersitsinissaanni atorfiusut suussuserneqarnissaat nassuiaatigineqarnissaallu.
- Sillimmasiisarfirmik pilersitsinerup inatsisilerinikkut kingunerisassaasa suussuserneqarlutillu nassuiaatigineqarnissaat.
- Sillimmasiisarfirmi atorfiit inuttalerneqarnissaanni sulisussat eqqortunik ilinniagallit ilisimasallillu sulisussarsiarinissaanni sulisoriinnarnissaannilu unammilligassat suussusersineqarlutillu nassuiaatigineqarnissaat.

Siunnersuutip aningaasaqarnikkut kingunerisassai

Inatsisartut Suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnerani aningaasaqarnikkut allaffissornikkullu kingunerisassat siunnersuummut nassuiaammi allaaserineqassasut. Tamanna naapertorlugu taakku siunnersuuteqartumit nassuiaatigineqarput.

Aningaasaqarnikkut allaffissornikkullu kingunerisassat pillugit siunnersuuteqartup naliliinerata akerlilernissaa Naalakkersuisunit tunngavissaqartinneqarsimangitsoq ataatsimiititaliap paasivaa. Tassunga atatillugu ataatsimiititaliamit tutsuigineqarpoq tamanna Naalakkersuisut

naammattumik misissorsimagaat, tamatumalu nassatarisaanik allanik kinguneqaateqas-sanngitsoq. Allatut naliliinissamut ataatsimiititaliaq maannangaaq tunngavissaqanngilaq.

Ataatsimiititaliap inassuteqaatai

Ataatsimiititaliami amerlanerussuteqartut Siumup Inuit Ataqtigiillu ilaasortaataasa inassutigaat sunnersuut akuerineqassasoq.

Ataatsimiititaliami ikinnerussuteqartoq Demokraatit ilaasortaataat siunnersuut pillugu ima oqaaseqaateqassaaq:

“Demokraatini isumaqarluinnarpugut Namminersorlutik Oqartussat niuertutut ingerlaniassanngitsut. Kissaatigaarput pikkorissut sullivinnik ingerlatsissasut. Amerlavallaariarluta takuni-kuuarput pisortat namminersorlutik suliffiutilinnut unammillertarnerat - tamanna suna tamaat atorlugu pinngitsoortinniartariaqarparput. Isumaqarpugut Namminersorlutik Oqartussat naalagaaffiup ingerlannissaa suliassarigaat - sullivimmik ingerlatsinani namminersortut unammillerlugit.

Kissaatigaarput Namminersorlutik Oqartussat allaffissornerlu pisariillisaavigineqassasut. Isumaqarpugut namminersortut unammilleqatigiinnerat ineriartortinneqartariaqartoq. Matuma siunnersuutit takutippaa killormorluinnaq eqqarsartoqartoq.

Tamatuma saniatigut aammaarluta oqaatigissavarput kusananngimmat Inatsisartut Siulittaasoqarfiata akuerisimammagu, siunnersuutit matumap ullormut oqaluuserisassanut ilannguneqarnissaa. Siunnersuut qinigaaffimmi saqqummiunneqarfimmini suliarineqareerpoq Inatsisartunilu amerlanerussuteqartunit itigartinneqareerluni. Tamanna tunngavigalugu ullormut oqaluuserisassanut ilannguteqqinneqanngisaannartussaagalarpoq.

Demokraatini tamanna tunngavigalugu Inatsisartut Siulittaasoqarfianit allakkat tigusimasagut innersuussutigerusuppagut. Tassani allakkami Inatsisartut Siulittaasuanit atsiorneqarsimasumi Siulittaasoqarfik ima allappoq:


"Imm. UKA2017/125, UKA2015-imi imm. 71-itut suliarineqareersoq, eqqarsaatigalugu Demokraatit ulloq 12. oktober saaffiginnissutaat siulittaasoqarfiup tiguaa oqaluuseralugulu. Siulittaasoqarfiup paasivaa ajuusaarutigalugulu immikkoortoq kukkunikkut UKA2017- imut oqaluuserisassanut ilanngullugu saqqummiunneqaqqissimammatt."

Tamannaannaq pissutigalugu partiit tamarmik demokrati tunngavigalugu sulinermit najoqqutassanik ataqqinnittut siunnersuut manna itigartittariaqaralarpaat.


Taamatut tunngavilersuuteqarluta inassutigaarput siunnersuut itigartinneqassasoq.”

Tamanna tunngavigalugu ataatsimiititaliami ikinnerussuteqartut Demokraatit ilaasortaa-titaata inassutigaa sunnersuut itigartinneqassasoq.

Taama oqaaseqarluni isumaliutissiisummilu allassimasutut oqaaseqaateqarluni ataatsimiiti-taliap siunnersuut aappasaaniigassanngortippaa.



Jens Immanuelson
Siulittaasoq



For Randi V. Evaldsen
Siulittaasup tullia




Ineqi Kielsen

Kelly Berthelsen



Martha Lund Olsen



Bendt B. Kristiansen



Peter Olsen